

Papru

KARASEANMAYA SHUARAN

Papí aar akuptukma

Karaseamaya Yus-shuaran Papru áatramiania nu

1 ¹Wi Páruitjai, Yus akatramu. Yúsak winia akatturuiti. Shuarka akatturchamai. Yussha chíkich shuáran akupturak akatturchamai, antsu Nun̄ki, Yus Apa, Jesusan jakamunmaya iniantkimia nu, tura Jesussha winia akatturarmai Yusa shiir chichamen etserkatniun.

²Wisha, ashí Yus-shuar wijaí pujuihia nusha, ju papí akupeaji. Ashí Yus-shuar Karasea nun̄kanam pujarmena nu áuj̄satarum tusan ju papin akuptajrume.

³Yus Apa tura ii Uuntri Jesukristusha waitnentramiania ásar yainmakarti imiatkinchanum tuke shiir pujustinian. ⁴Yus ii Aparí nuna wakera asamtai, Jesus ni ayashin surumak wáitsamiayi ii tunaari asakártinian. Nuna tura ashí tunáa ju nun̄kanam ana nuyá ankant awajtamsatai tusa in yáinmaji. ⁵Tuma asamtai tuke Yus shiir atí. Ayu.

Chíkich uwempratin chichamka atsawai

⁶Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum. ⁷Wátsek, nekas chíkich chicham penké atsawai shuar umikiar uwempratin. Antsu yajaya shuar atumín taar penkercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai. ⁸Tuma asamtai Yus nin yajauchiniam yuminkrattawai. Wisha Yus-Chicham yapajiamun etserkamtainkia Yus

winia yumĩnkrurtatui. Nayaimpinmayā suntarsha nusháa chichaman wi etserkachmaj nuna étserkuĩnkia nunsha yumĩnkrattawai. ⁹Paant ujakjarme túmaitiatnak ataksha ujaajrume: Nánkamas shuar niisháa uwempratin chichaman, wi etserkachmaj nuna étserkuĩnkia Yus yumĩnkrattawai.

¹⁰Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiayi

¹¹Antsu nekaatarum, yatsuru. Uwempratin chichaman wi étserjana nuka áentsnumiānchuiti. ¹²Aentska ujakkachmai. Unuitiutnasha unuitiurchamai. Antsu Jesukrístuk winia paant jintintruamai.

¹³Tura wi yáunchu ti yajauchin túramiay nuka antukchakaitrum. Israer-shuar Yúsnan takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. ¹⁴Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsurí shuaran wijíaj métek uunt armia nuna nankaamas Yúsnan takasmajai. Túmaitiatan aya winia úuntrun chichamen ti umirniuyajai. ¹⁵Túrasha wikia akiintsain Yus winia achirkamiayi, tura ti anenkratmaríjjai winia anaitiukmiayi. ¹⁶Nuikia shiir enentáimiuk ni Uchirín paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai. ¹⁷Uunt péprunmasha, Jerusarénumka, wéchamjai winí emkaru Yus akatramujaj chichastinian. Antsu wárik Arapia nunkanam wémajai. Tura nuj Yúsán enentáimtasuan atak Tamasku péprunam waketkimjai. ¹⁸Tura menaintiú uwí nankaasmatai, nuyá Pítrujaj áujmattsataj tusan Jerusarénum jeamjai. Tura jimiará semanachik pujusmajai Pítrujai. ¹⁹Tura Jakupuncha, ii Uuntri Jesusa yachíá nuna, wáinkiamjai. Nú arantka chikichnaka Yus akatramunka wáinkiachmajai. ²⁰Yus iirui. Wi tájana nu nekasaiti, wáitchaiti.

²¹Nú ukunmasha Siria nunkanmasha, Sirisia nunkanmasha wémajai. ²²Tuma asamtai ashí Yus-shuar Jutía nunkanam pujuarmia nu winia nekaracharmai. ²³Aya antukarmai. “Yaunchu in ti áintrammíaj nu yamaikia Yus-Chichaman étseruk wekaawai. Yáunchuka in amutmaktinian wakeriniaitiat yamaikia iniaisaiti” tiarmai. ²⁴Túrawar winia enentáimtursar Yúsán shiir yumĩnsarmai.

Chíkich Yus akatramu Paprun shiir enentáimtuiniawai

2 ¹Tura katurse uwí nankaasmatai wisha Pírnapíjjai Jerusarénum wémaji. Titiuncha jukimjai wijíaj. ²Yus akupta

asantai Jerusarénum wémajai. Tura nuí jean aya Yus-shuara úuntriñiañ áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar aín tusan tu áujmattsamjai. ³Niisha Yus-shuara úuntriñtiat itiurchat enentáimpracharmai. Antsu chíkich shuarka Titiu Israer-shuarchaitiat wijiaí pujakui niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai. ⁴Tura nu shuar ántar yachi ániak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asantai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiurchat ana nujai uwentikrampratniun wakerutmakarmaji. ⁵Túrasha penké ishichkisha umikchamji. Antsu atumíñ Yus-Chicham yapajniátsuk métek jeartamat tusar ni chichame penké anturkachmaji. ⁶Nu arantcha Yus akatramu uuntriñkia yamaram túratniunka suruscharmái. Nincha ashí aents ti neka ainiawai tu enentáimtuiniawai. Kame nu shuar ti nékainiakuiisha ti enentáimtatsjai. Yus ashí shuaran mash métek iyatsuk. ⁷Yus akatramu uuntriñsha Yus winia Israer-shuarchan Yus-chicham ujaktinian akuptukma nuna nekarawarmai. Tura Pítruncha akupkamai Israer-shuaran Yus-Chicham ujaktinian. ⁸Pítrun Israer-shuarnum akupkama nú Yusak winiasha akuptukmai Israer-shuarchanum. ⁹Tuma asantai Jakupusha, Pítrusha, Juañsha, Yus akatramu uuntriñ ásar, Yus winia ti paant akuptan nekaawar, winiasha Pirnapínsha, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusar¹. ¹⁰Áyatik “Kuítrinchá enentáimtusrum tuke yáñtarum” tiarmai. Wisha núnaka ti wakerakun tuke túriniaitjai.

Papru Pítrun chicharkamai

¹¹Tura nú ukunam wi Antiukía péprunam pujain Pítiur tamai. Tura nuí yajauch túramtai, Yus-shuara úuntriñiak chicharkamjai. ¹²Iis, Israer-shuar tuiniawai, “Israer-shuarcha Muisais timia núnisan tsupirnakcha asantai, nu shuarjai yurumáshtiniaiti” tuiniawai. Túmaitiat Pítiur yurumámñian nékak^u, emka Sántiak shuar táatsañ Israer-shuarchajai yurumámai. Tura nuyá Sántiak shuar Jerusarénumiá Antiukíanam jeawarmatai Pítiur ashamak tsupirnakcha shuarnumiá kanakin yurumáchmai. “Tsupirnaktiniaitme” tiniu ainia nuna ashamak túramai.

¹³Tuma asantai chíkich Yus-shuar, Israer-shuar armia nu, Pítrujai métek emka yurumáwaru ániayat jimiará enentai takusar ukunam iniaisarmai. Pirnapísha neka áyat nútiksan nupetnakmai. ¹⁴Tura nuna íisan ashí íimiainiañ Pítrun chicharkamjai. Yus Shiir Chicham tana nujai

métek wekasachu ásarmatai tímiajai “Ame Israer-shuaraitiatam Israer-shuarti ikiukim tsupirnakchajai yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijjai métek wekasatin ániawai” tiip” tímiajai.

**Israer-shuarsha Israer-shuarchasha mai métek
Yúsán enentáimtusar uwemprartatui**

¹⁵Iikia nekas Israer-shuaraitji. Israer-shuarcha, tunáa ainia áaniuchitji. ¹⁶Túmaitiatar ju nékaji. Akupkamu umíamujai uwemprachminiatji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajainchu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujai péñker ajaschattaji. Akupkamunka shuar umiktaj táyat, chikichkí shuarkesha nujai péñker ajaschamniaiti. Nu nekaar antsu Jesukrístu nekas enentáimtusmaji péñker ajastai tusar. ¹⁷Tura Israer-shuar enentáimprashimpiash, “Wátsek, núnisaitkiuinikia wisha Krístun enentáimtustaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashiniaiti. ¹⁸Antsu yaunchu, wi túrashtiniaitjai tímiaj nuna awainkin túratniuitjai tákunka nuikia nekas tunaitjai. ¹⁹Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjai iwiaaku pujajai ni wakera nuna umiktinian. ²⁰Wisha Krístujai krúsnum jákaitjai. Tuma asamtai yamaikia wikia iwiaaktsujai wi wakeraj nuna túratniun antsu Kristu winí iwiaakui ni wakera nuna túratniun. Tura ju ayashnium pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi. ²¹Yus ti péñker asamtai itiurak “Kristu ántar jakamiayi” títiaj. Iis, aya akupkamun umirkan péñker ajasminiaitkiuinikia, nuikia Kristu ántar jákaayi.

Yus akupkamu tura Yus enentáimtustin

3 ¹¿Wariñ aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktushamkajrum? ²Wátsek, aniastatjarne, enentáimpratarum. ¿Warijijain Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram? ³¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarijijai umiktin enentáimprarmek. ⁴Penké ánrarmek wáitsamarum tura antsu ishichkisha unuimiarchamkarum? ⁵Naka enentáimpratarum. Yus ni Wakanín súrantsuk tura aents

túrachminian atumín ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

⁶Yaunchu ii uuntri Apraám enentáimpratai. Yus-Chicham nin tawai: “Apraám Yúsan enentáimtusmatai Yus “Ayu, pênkeraitme” tímiayi” tawai.

⁷Iis, nujai páantchakait. Ashí shuar Yúsan enentáimtuinia nuka Apraámjai métek enentáimpraru ásar, ni uchiría áintsan ajasaru ániawai. ⁸Yamá páantaiti. Yus ashí Israer-shuarchancha tawai “Aya winia enentáimtursarum pênker átratume”. Israer-shuarchasha nujai pênker ajastinia nuna ti yaunchu neka asa, Apraáman ujakmiayi, “Ámijjai ashí aents ti shiir ajasartatui.”

Tu ujakmiayi. ⁹Tuma asamtai ashí shuar Yúsan enentáimtuinia nuke Apraámjai métek pênker ajasar shiir warasartatui.

¹⁰Antsu ashí shuar “akupkamun umirkan uwemprattajai” tuinia nuka yajauchiniam yumiñkramu ániawai. Yus-Papinium árchamukait “Ashí shuar Yus akupkamun ashí aarma nuna takamtsuk umirkachka yajauchiniam yumiñkramu ániawai.” Tu áarmaiti.

¹¹Nújainkia páantaiti. Akupkamu umirkatniujai pênker ajaschamniaiti Yusjai, antsu aya Yus enentáimtusam pênker ajasam uwemprattame.

¹²Shuar akupkamu umirkatniun enentáimna nuka aya nujai pênker ajastinian enentáimui; Yúsan enentáimtak pênker ajastinian enentáimtsui.

¹³Tura Kristu yamaikia uwemtikrampramji. Akupkamun umirkachu yumiñkramuiti tana nuka in túramtsuji. Antsu Kristu in yainmaktin krúsnum jaka yumiñkramu ajasmiayi. Kame áarmaiti:

Shuar jakati tusa numiniam nenasma yumiñkramuiti.

¹⁴Tuma asamtai Jesukrístu jakamujai ashí Israer-shuarchasha Apraámjai métek pênker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achiktatji Yus enentáimtusar.

Yus akupkamu tura Yus túrattana nu anajmarma

¹⁵⁻¹⁶Iis, yatsuru, Yus Apraáman Chichaman najana anajmatuk, “Ámijjai tura amée weeá akiinkiattana nujajisha ashí aents ti shiir ajasartatui” tímiayi.

Kame ‘amée weeá akiinkiartatna nujai’ tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajítsuk umiktiniaiti. Umitsuk iniaisachminiaiti. Patattasha patattsachminiaiti.

¹⁷Wátsek, Yus núnisan Chichaman Apraámjai najana, ukunam umitsuk iniaisachminiaiti. Tura Chichaman najanamia nú ukunam, kuatru siantu

nuyá trainta (430) uwí nan̄kaasmatai, Yus ni akupkamur̄in Muisaisan susamiayi. Túramaitiat nuj̄aj̄i Yusa yaunchu Chichamen yapajíachmiayi iniaisatniun. ¹⁸Tuma asamtai Yus timia nuka tuke uminkiattawai, Yus yaunchu Apraámj̄aj̄i Chichaman najana asamtai. Núj̄aj̄in̄kia páantaiti, péñker ajastajtsar akupkamu umikrikia shiir pujuschartat̄ji antsu Yus timia nuj̄aj̄i iikia takatsuk shiir pujustat̄ji. Nuna tsan̄katkamiayi Yus Apraámj̄aj̄i Chichaman najaneak⁴.

¹⁹“¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsain̄ Yus tímía nu uminkiachminiuyayi. Tuma asamtai nii táatsain̄ ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntarī j̄u akupkamun ashí iwarar Muisaisan susar akatrarmiayi Israer-shuaran susárti tusar. ²⁰Antsu chikichik shuar niñki takastinian enentáimkiun̄ka chikichan atsumatsui. Tura Yus aya chikichkiiti. Niñki chikichan akattsuk ashí aentsun Apraámj̄aj̄i péñker awajsatniun Apraáma anajmatar niij̄aj̄i Chichaman najanamiayi.

Yus akupkamu itíúrkáti

²¹“¿Tura Yus jimiará chichamj̄aj̄i chichaawak, tíchaintmeash. Emka Apraáman “Juj̄aj̄i uwemprattame” tíchamkia, nuyá Muisaisan ni akupkamur̄in súsachmakia?” tíchaintmeash. Tura áintsachuiti. Nekaata, akupkamu umirkatniuj̄aj̄i Yusj̄aj̄i tuke péñker pujusminiaitkiumka nuyá aya akupkamuj̄aj̄i uwempram tunaaj̄aj̄in̄chu ajasaintme. ²²Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukrístu enentáimtuinia nú shuar, aya Yus timiá asamtai, uwemprattatui. ²³Tura Kristu táatsain̄ Nin enentáimtuschamniauyayi. Tuma asamtai Nii táatsain̄ akupkamuka in emettama pujurtamji aya akupkamu tana nu umirkatin. Tura ukunam j̄u nekanayi: Kristu enentáimtusar uwempratniuit̄ji. ²⁴Akupkamu, nuika, in waitmakmaji uchin kuírchin wainnia áintsan̄. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsaj̄aj̄i péñker áiniawai. ²⁵Yamáí Kristu nekas enentáimtustiniaiti tuma asamtai yamaikia akupkamu kuirchia áintsan̄ wáitmats̄ji. ²⁶Antsu Jesukrístu enentáimtusar, nuj̄aj̄i Yusa uchirí úuntmaru ajasuit̄ji. ²⁷Ashí Kristu náariin̄ imiaimiutirmeka Kristu áintsan̄ ajasuitrume. ²⁸Jesukrístuj̄aj̄i tsaniñkiu asarⁱ imiá métek aji. Israer-shuar, Israer-shuarcha, ankant ainia nu, ankantcha ainia nu, áishman̄, nuwá, ashí mash Jesukristunuitkiun̄kia yamaikia “niishaaiti” tu enentáimprashtiniaiti. Ni shuarī mash chikichik áiniaji. ²⁹Tura Krístunuitkiurmeka Apraám weeá áintsan̄ ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

4 ¹Kuítrinniu uchirí ashí ni aparí takakna nuna niiniu áchattawak ukunam. Tura uchichitkiun̄ka ni aparí takarniuriya núkete. ²Tuke

uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíni ashí wáinkiatniuiti. ³Núnisrik iisha úchichik asarkia ashí aentsu akupkamurí umirkatniuji. ⁴Tura tsawant jeamtai, Yus ni Uchirín akupkamiayi ju nuñkanam. Niisha Yúsaitiat nuwanam akiiniamiayi. Tura aents ajasmiai. Tura aents ajas yaunchu akupkamuncha umirkatniuyayi. ⁵Nujai ashí aents akupkamun umirkatin armia nuna uwentikrataj tusa támiayi. Tura iisha yamaikia nujai ni uchirí uunt ajasminiaitji. ⁶Atumsha nekas ni uchirí ajasakrumin Yus ni Uchirí Wakanin atumi enentáin akupturmakuiti. Tura nu Wakan atumí enentáiya Yúsán “Aparú” tawai. ⁷Tuma asamtai yamaikia aya takarniuchuitme antsu Yus ni uchirín najatmaiti ámin. Tura ni uchirí asakmin ashí Yus takakna nuna amastatui Krístuiyan.

Papru nu Yus-shuaran yáintinian wakerawai

⁸Yaunchu átum nekas Yus nékachkuram, ántar-yus írunna nu umirkamarme nekascha yúsak. ⁹Tura yamaikia nekas Yus nékarme, kame Yus atumin nekarmarme. Núnis asamtai itiuksuk atak aentsu akupkamurí umirkatin enentáimprum. Nujai kakaram ajaschamniaitme tura umikmesha yainmakchattawai uwempratin. ¹⁰Átumka jísat ti najanearme. Yaunchu jísat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum. ¹¹Ashamajai, atumíin ántrankeash takasmaj tusan. ¹²Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nui pujakui ishichkisha yajauch awajtuscharmarme. ¹³Antsu nekarmarme ayashruj itiuksat pujayatan Yusa shiir chichamen emka ujakmajrume. ¹⁴Tura winia sunkur ti yajauch awajtaiñ atum winia nakitrurum muñrukchamarme, antsu Yusa suntaríá áintsarmek itiamarmarme. Jesukrístu anturkatniua áintsarum anturtukmarme. ¹⁵Maa, wi nékajai, nuik atumí jimi ukuinkiarum surusaarme, túramniaitkiurmeka. Tura shiir enentáimprarmena nusha itiuksukait yamaisha. ¹⁶Yamaikia nekas chichaman étserkun ¿atumí nemasrj ajasjak? ¹⁷Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winíya akantamkitiai tusa wakerutmainiawai, winia antsu shiir enentáimtursat tusar. ¹⁸Niisha nekas yainmaktinian wakerutmainiakka atumin shiir awajtamsatin tuke péñker ainti, wi atumjai pujainsha tura pujatsainsha. ¹⁹Uchirú, nuwá jurertaj tana núnisnak ataksha wáitiajai Krístu atumíin paant atí tusan. ²⁰Atumjai pujaknaka maak aintjai. Yamái pujaknaka nekas nusháa chichasaintjarme. Itiuksatjarmetsuk nékatsjai.

Akarsha, Sarasha jimiará Chichaman nakumainiawai

²¹Ayu, “akupkamu umirkatniuiti” támena nu nekaata; akupkamuka júnisaiti. ²²⁻²³Aarma awai: Apraám jimiará uchirtiniuyayi. Emka

ni takarniurĭ jurermiayi Ismaeran. Nuyá Apraáma nuwĕ jurermiayi Isakan. Ismaera nukurĭ Apraáma takarniuriyayi. Tura Apraám Yusan enentáimtutsuk niijĭajĭ kanarmatai, ni takarniurĭ jurermiayi. Tura antsu Isaka nukurĭnkia takarniurĭinchuyayi, antsu nekas ni nuwĕ áuyayi. Niisha ti úntchiniak, Yus “jurertatme’ tímiayi. Tuma asamtai Yus timiajajĭ Isakan jurermiayi. ²⁴Ayu. Yamái tájana nuka Yusa Chichamen jímiaran nakumui. Ismaera nukurĭ Akar chikichik Chichaman nakumui. Yaunchu Senái muranam Yus ni akupkamurĭn áarmiayi Israer-shuar, takarniua áintsanĭ, umirkarti tusa. ²⁵Senái murasha Akara nunĭke Arapianam wajaawai. Akarsha Senái muran nakumak, ashí Israer-shuaran “Akupkamujajĭ uwempramniaiti” tuinia nuna nakumui. Yamaisha Israer-shuara uuntrĭ Jerusarénnun pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsanĭ wáitsar takainiawai. ²⁶Antsu ashí Yus-shuarti uwempra asar imiankas anĭkant pujajĭ. Nayaimpinmayaĭ Jerusarénnumiá áentsuitĭji. Nuyá áentsti tuke anĭkant pujuiniaji. Nuyá aents asakrin, nu yakiya Jerusaréńka ii nukurĭa áintsanĭ enentáimpramniaiti. ²⁷Junis áarmaiti:

Warasta, misurma, uchi takakchiatmek;

Ti shiir warasta, uchí najawĕ nékachiatmek.

Nuwá ajapamu uchin jurertatui;

Nuwá áishrinnia núnaka nanĭkaamas uchirtin átatui.

²⁸Iisha, yatsuru, Isaka áintsar¹, Yus timiajajĭ akiiniatĭji. ²⁹Yaunchu Ismaer Isakan kajerak itirchat awajsamiayi. Núnisanĭ yamaisha Ismaera áintsanĭ aya ayashnumiá ainia nú aents Yusa Wakaníya akiinia nuna yajauch awajenawai. ³⁰Tura Yus-Papinium áarmaiti:

“Takarniusha, ni uchirĭjĭajĭ, ajapam awemata. Nekas péńker nuwá uchirĭjĭajĭ tsaniĭ pujuschamniaiti. Aparĭ kuĭtrĭncha achikchamniaiti,” tawai Yus-Papí.

³¹Ayu, yatsuru, nekaatarum. Takarniu uchirĭnchuitĭji antsu anĭkant pujajĭ nekas péńker nuwá uchirĭ asar¹.

Yusjajĭ tuke anĭkant atarum

5 ¹Kristu uwemtikrampramiaiĭji tuke anĭkant átinian. Tuma asamtai kakaram ajasam tuke anĭkant pujustá. Ataksha nu itirchatnum waketkip.

²Wi Papru asan ujaajrume. Átum Muisais timia núnisrumek tsupirnakrumnińkia ĩKristu nuikia warĭ itiertamkamniait?

³Ataksha tájarne, ashí tsupirnakua nu shuar ashí Muisais timia nuna takamtsuk umirkatniuiti. ⁴Atum “Akupkamu umíakmin Yus shiir enentáimturmastatui” tárumna nu, nu shuartiram Krístuiyaĭ tupanĭniuitrume. Yusa anenĭkrattairiyaĭ kanakniurme. ⁵Iikia, antsu, Yusa Wakanĭjĭajĭ tura Yus enentáimtakrin Yus shiir enentáimturmastatĭji, tu

enentáimji. ⁶Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷Atumsha Krístujai péñker wekaimiarme. ¿Urukamtai nekas Yus timia nu iniaisatin enentáimprum ataksha akupkamunam waketkitin? ⁸Nú enentai Yúsaiyanchuiti. Nijijai wekasatniunka Yus achirmakuitrume. ⁹Ju enentáimpratarum: Karía ishichik yuminnium enketam mashⁱ karimtiktsuk. Aneartarum atumsha. ¹⁰Ayu, Yus yáinmakrumin wi tájana nu nusháa enentáimprashtratume, nékajai. Tura atumin yajauch áujmatramainia nuna Yus asutiáttawai páchitsuk.

¹¹Wíkia, yatsuru, yamaisha “tsupirnaktiniaiti” tuke tákuin̄kia Israer-shuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuin̄kia kajertukcharainti. ¹²Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

¹³Atumniasha, yatsuru, Kristu tuke an̄kant awajtamsarme. Tura an̄kant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum. ¹⁴Ju chichamjai ashí akupkamu mash uminkiatawai: Ame ayashim aneamna áintsamek chíkich shuarsha aneata. ¹⁵Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

Ayash wakeramu tura Yusa Wakaní wakeramu

¹⁶Juna tájarme: Atumí ayashi wakerana nu umikijai tusarum Yusa Wakaní kakarmarjijai wekasatarum. ¹⁷Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait. ¹⁸Tura Yusa Wakaní jintinramkuin̄kia, aentsu akupkamurijijai itit áhattame.

¹⁹Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin, ²⁰ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nan̄kaamantu enentáimtumastin, aya niisháa niisháa enentáimsartin, níniunak íistin, ²¹yajauch enentáimtunaistin, man̄kartuatin, nampektin, nampernum aya ti yurumin, tura ti nampen átin. Chíkich nujai métek áiniawai. Nuik ujakmajrumna núnisnak ataksha tájarme: Shuar nuna túrakka Yusai pujustinian pen̄ké tujinkiattawai.

²²Ayu, yamaikia Yusa Wakaní kakarmarjijai túratin enentáimsatai. Yusa Wakaní ii enentáin pujak, péñker túratniun nerektinia áintsan neremtikramji. Ju áiniawai: aneatin, shiir enentáimsatin, Yusjai tura shuarjai nawamnaikiar wekasatin, shiir enentáijjai katsuñtratin, chíkich shuar shiir awajsatin, tsan̄ka átin, tana nuna tímiatrusan̄ umiktin, ²³péejchach ajastin, iik íimiasar tunáa túrashtin. ¿Ju túratniuncha yaki

surimia? ²⁴Shuar Jesukrístunu ainia nu, ni ayashí wakeramuríncha tura nunisañ ni túramuríncha surimiak wekaawai. Ni ayashí krúsnum maantniua áintsañ túraiti.

²⁵Yusa Wakaní kakarmarijijai Yus-shuar ajasu asar, núnisrik Yusa Wakaní kakarmarijijain wekasatai. ²⁶“Wats, nekapnaisatai. Wi imiá péñkeraitjai” nuámtak túnaisuk, yajauch enentáimtunáischatniuiti.

Yáinniaiktarum

6 ¹Túrasha, yatsuru, Yus-shuar tunáa túrashtimpiash. Atumsha nekas Yusjají wekaarumna nu, nu wáinkiumeka, yátsum Yusjají iwiarat tusarum yáintárum. Tura nankaamantu enentáimtumatsuk túratarum. Tura amesha nekamata. Tunaanum iniarají tusam anearam wekasata. ²Káarak kijin akui nuámtak yáiniaiktin átsuk. Núnisrumek atumsha, itiurchatrí akui nuámtak yáiniaiktarum. Túrakrumka Kristu akupeamurí umíarme.

³Shuar tujintiyat “nankaamantuitjai” tákuñka ananmamui. ⁴Shuar ní túramuríniak enentáimtumastiniaiti. Níniunak enentáimtumakuíñkia tura péñkeraitkiuñkia chikicha túramurí iirtsuk, antsu níniun péñker íis wararsattawai. ⁵Iis, ashí ní káarkariniak júkishtinkiaiti.

⁶Shuar Yus-Chichaman unuimiatna nu, nu shuar nin jintíana nuna ashí takakna nujají yáintí.

⁷Ananmamawairap. Shuar Yúsan anankatniun tujintiawai. Ame araamna nuna nereñ júuktatme. Chíkich nereñ áchattawai. Atumi enentáincha núniskete. ⁸Iista. Shuar ni ayashí wakeramunak tuke enentáimtakka, jatají nerea áintsañ araaiti. Nerekmatají jákatniun júuktatui. Tura Yusa Wakaní wakera nuna tuke enentáimtakka Yusjají tuke shiir pujustinian júuktatui. ⁹Nu asamtai péñker túratin yawetkishtiniaiti. Tura pimpitsuk takasar júuktin tsawant jeamtai, páchitsuk júuktatjii. ¹⁰Tuma asamtai yáinmin ákuñkia ii jeajnia nu túratniuitjii nekaska ii yachí yáiníkiartin, Yus-shuar ainia nu. Tura ashí shuarsha yáintinaiti.

Jesukrístunu ajasar yamaram akiiniatin nekas péñkeraiti

¹¹Íimsakua, winia uwejrújají urutá uuntna áatjarum. ¹²“Nekas tuke tsupirnaktiniaitme” tuinia nuka áyatik shuar shiir enentáimtursartí tusa tuiniawai. Kristu krúsnum jakamun étsereakuñkia itiurchat awajtusarajín tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisañ tsupirnaktiniaiti. ¹³Pai. Tura nú shuar tsupirnaku áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnaku tusa wakerutmainiawai. Áyatik atumin “Pai, niisha tsupimiatiakjii” titiai tusar wakerutmainiawai. ¹⁴Wikia, antsu, aya ii uuntri Jesukrístu

krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak jū nun̄kanmaya ana nuna jaka áintsan páchiatsjai; tunaanum winia útsutkatin atsawai. ¹⁵Krístunu ajasrikia tsupirnaktincha tsupirnakchaitkiursha mai ántraiti antsu yamaram akiiniatin nekas pénkeraiti. ¹⁶Ashí nekas Yus-shuaran, wi tájana nujai métek wekainia nuna, Yus shiir enentáimias yáinti tuke shiir pujustinian.

¹⁷Yamaikia itiurchat najatawarain̄. Jesusa takatri takaakui asutiawarma paant ayashruj chimikma írunui.

¹⁸Yatsuru, ii uuntri Jesukrístu atumin shiir yainmakarti. Nuke atí.